

la camera d'imprestedì per le cosse dil Polesene, intervenendo le rote di l'Adexe etc. Parlò primo sier Alvise Badoer avocato; li rispose sier Gasparo Contarini provedador sora la dita camera, qual è stà sopra dite robe. Poi parlò sier Piero Boldù, qual è stà *etiam* a la rota di l'Adexe et ha interesse, *tamen* niente fo concluso, e terminato *iterum* il Contarini vadi de li.

A dì 21. La matina non fo alcuna letera, et fu parlato in Colegio di risponder a Verona zercha la scrittura che il Pexaro vol dar a li agenti cesarei, e terminato mostrarla a tre doctori avocati in questa terra, *videlicet* domino Rigo Antonio de Godis, domino Bortolo Da Fin, et domino Tomaxo Anechin. Et cussi li Savii fono con ditti avochati sopra questa materia.

Noto. Eri se intese, per la nave di Antonio Parapugna vien di Alexandria carga di zenere e capari, come a dì 30 Novembrio al suo partir di Alexandria erano intrate le nostre galie li in porto dentro dil Farion.

Da poi disnar, fo Consejo di X con la Zonta sopra la materia di sali di Bergamo per il dazio, intervenendo quel di Taxi. Et perchè sier Bernardo Marzelo capitano di Bergamo, venuto in questa terra per gratia auta in Gran Consejo, per la egritudine di soa mojer, et par sia informato, fu terminà che li Cai di X lo debbi aldir.

Fu presa una gratia, che sier Marco Antonio Manolesso, qual fo al tempo di questa guerra podestà di la Mota, vadi a compir il suo rezimento.

Fu posto *etiam* la gratia di sier Nicolò Minio, fo podestà a Monfalcon et preso da i nimici, vadi in dito rezimento poi harà compito sier Zuan Batista Moro castelan di Monfalcon, qual per el Consejo di X fu posto Podestà; et perchè non chiariva il tempo, non fu presa.

Fu preso alcune gratie di debitori di le 30 et 40 per 100 stati Avochati grandi, pagar di danari di Monte Novissimo, e fo prese di 5, tra li qual sier Zuan Alvise Sanudo qu. sier Domenego.

Fu posto la gratia di sier Nicolò Coco, fo podestà a Maran, debitor di le 30 et 40 per 100, vol suspension dil so' debito.

Fu posto la gratia di sier Vidal Vituri, fo podestà a Maran, suspender li sui debiti di 30 et 40 per 100 per do anni, et non fu presa.

Exemplum.

109

1519, die 19 Januarii, in Rogatis.

Sier Antonius Condulmario, sier Gaspar Mari-petro, sier Marinus Mauroceno *sapientes super aquas.*

De quanta importantia sia, per la salubrità et securtà de questa cità, la materia di le acque, el non è alcuno in questo Consejo che per la prudentia sua non lo intendi; et per proveder de recuperar il dano necessario in qualche parte *cum* quel maneo incomodo et graveza che sia possibile per il bisogno de la materia predita, senza il quale, come ogniun intende, non si pol far cossa alcuna, però l'anderà parte: che per auctorità de questo Consejo sia preso et statuito, che a tutti i trageti de questa nostra cità, quali tragitano a soldo et a bagatin, cussi da luogo a luogo in questa cità come da questa terra ai lochi circostanti, i Savii nostri sopra le acque possano *de presenti* meter uno over duo barcharuoli per trageto sicome cognoscerano ricerchar et poter portar lo inviamiento de epso trageto; il che far possino per una volta solamente, et questo far debino, o per via de incanto, o de acordo, sicome giudicherano poter trazer mazor fructo et utilità. I quali barca-ruoli cussi posti, non siano tenuti a contribuir più cossa alcuna a la Scuola, nè far pasto o colazione ai compagni, ma liberamente siano acceptadi da li altri senza alcuna spesa. Da poi veramente intrati, restino a le condition de li altri suo' compagni senza differentia alcuna; dichiarando che i dicti da esser posti, metter et substituir possino uno in loco suo che trageti; et in caso che alcun de loro morisse avanti anni 10, i sui heriedi possino meter uno, over uno de loro exercitarsi in dicto trageto fino compirà el tempo di anni 10 predicti. Et aziò questo augumento de barcharuoli vegni a tornar al debito numero, sia preso che in luogo dei primi che vacherano in dicti trageti, non se possi elezer nè poner alcuno, ma restino questi duo novi da esser posti, *ut supra*, in luogo dei vachanti; et a questa deliberation non obsti jurisdiction, nè prerogativa de persona alcuna de intrar in dicti trageti per questa volta sola, quale se intendi esser suspesa.

Præterea, che tutti bastasi de qualunque condition si voglia, *etiam* quelli da entro el Fontego de le farine et qualunque altro termine excepto, siano obligati per uno anno *tantum* servir a l'oficio so-